

PII VII

SOCIETATIS IESU IN REGNO UTRIUSQUE SICILIÆ RESTITUTIO^{*}

DILECTO FILIO GABRIELI GRUBER, PRESBYTERO, SUPERIORI, AC PRÆSIDI
GENERALI CONGREGATIONIS SOCIETATIS IESU IN IMPERIO RUSSIACO,

PIUS PAPA VII,

Dilecte fili, salutem
et apostolicam benedictionem.

Per alias Nostras in forma brevis datas litteras die septimo Martii MDCCCI, petente serenissimo Paulo I, tunc totius Russiæ Imperatore, iustisque de causis animum Nostrum moventibus, prævia ad infra scriptum tantum effectum derogatione similium in forma brevis litterarum Clementis XIV prædecessoris Nostri, incipientibus DOMINUS AC REDEMPTOR, super suppressione ac extinctione Regularis Ordinis Societatis Iesu, datarum die vigesima prima Iulii anni MDCCCLXXIII, Presbyteris sacerdotalibus in imperio Russiaco degenetibus, qui novæ Congregationi Societatis Iesu adscribi vellent, facultatem dedimus in unum corpus sese uniendi, adunandi et coniungendi, sacramenta de consensu Ordinariorum administrandi, iuuentutem bonis moribus ac liberalibus disciplinis imbuendi, et sub regimine tunc in humanis degentis Francisci Kareu, Superioris ac Præsidis Generalis huiusmodi Congregationis a Nobis ad Nostrum et Sedis Apostolicæ beneplacitum deputati, intra fines dumtaxat imperii Russiaci, vivendi iuxta regulam S. Ignatii a fel. rec. Paulo III, prædecessore Nostro, suis constitutionibus confirmatam et approbatam, prout in iisdem litteris latius continetur.

Nuper vero charissimus in Christo filius Noster Ferdinandus, utriusque Siciliæ et Hierusalem Rex illustris, exponi Nobis fecit, videri sibi, maxime in præsentium temporum circumstantiis, profuturum ad regni sui iuuentutem bonis moribus informandam, ac rectis salutaribusque doctrinis instituendam, si, quemadmodum in Russiæ imperio, ita in suis dominiis constitueretur eadem Congregatio Societatis Iesu, sub ipsa regula Sancti Ignatii a præfato Paulo III Pontifice confirmata, inter cuius præcipua munia, Sodalibus eidem adscriptis incumbentia, illud recensetur, adolescentes, aut in Collegiis altos, aut in publicis Gymnasiis congregatos, instruendi ac erudiendi. Nos igitur, dicti Ferdinandi Regis vota suorum subditorum spiritualem

* In *Institutum Societatis Iesu*, Florentiæ 1892, vol. I, pp. 335-337.

ac temporalem utilitatem præ se ferentia, ac majorem Dei gloriam, et animarum Christi fidelium salutem in primis respicientia, pro pastoralis Nostri officii debito, benigno animo excipientes; ex certa scientia ac matura deliberatione Nostris, deque apostolicæ potestatis plenitudine, præfatas Nostras apostolicas in forma brevis litteras pro imperio Russiaco datas, ad regnum utriusque Siciliæ extendimus; ideoque facultatem tibi concedimus et impertimur, ut sive per te, sive per dilectum filium Caietanum Angelini ante dictæ Congregationis Procuratorem generalem, omnes et singulos, qui in utriusque Siciliæ regno Congregationi huiusmodi, quæ Petropoli ac imperio Russiaco auctoritate Nostra per supra dictas in forma brevis litteras constituta exsistit, nomen dare velint, eidem Congregationi unire ac coniungere, intra fines regni utriusque Siciliæ, libere ac licite possis et valeas. Hos autem in una seu pluribus Domibus congregatos, ac sub tua, et pro tempore exsistentis Præpositi Generalis, iuxta primigeniam S. Ignatii regulam a Paulo Papa III prædecessore Nostro suis apostolicis constitutionibus confirmatam, obedientia viventes, ut pariter intra fines utriusque Siciliæ, ad puerorum institutionem in catholica religione ac bonis moribus et disciplinis incumbere, Collegia et Seminaria regere, itemque Christi fidelium confessiones excipere, verbum Dei annuntiare et sacramenta administrare, respectivis locorum Ordinariis approbantibus et consentientibus, libere, et licite similiter posse decernimum et declaramus; eosdemque ac Domus, Collegia et Seminaria sicut præfertur erigenda, Congregationi Societatis Iesu in Russiaco imperio constitutæ unimus atque adgregamus, et sub Nostra et Sedis Apostolicæ immediata subiectione et protectione recipimus: reservantes Nobis et successoribus Nostris Romanis Pontificibus ea decernere ac præscribere, quæ ad Societatem ipsam firmandam et communiendam in Domino noverimus expedire, quemadmodum etiam in præmemoratis Nostris litteris die septimo Martii MDCCCI, quas hic pro expressis haberi volumus, Nobis et successoribus Nostris reservavimus.

Decernentes has Nostras præsentes litteras semper firmas, validas et efficaces fore et esse, suosque plenarios et integros effectus sortiri et obtainere debere, ac illis, ad quos spectat et pro tempore spectabit, in omnibus et per omnis plenissime suffragari, et ab eis respective inviolabiliter observari.

Non obstantibus quibuscumque ordinationibus et constitutionibus apostolicis, statutis et consuetudinibus, privilegiis quoque et indultis et litteris apostolicis in contrarium præmissorum quomodolibet concessis, confirmatis et innovatis, ac illis præsertim Clementis XIV incipientibus DOMINUS AC REDEMPTOR sub annulo Piscatoris expeditis die vigesimo primo Iulii MDCCLXXIII, in iis dumtaxat quae præsentibus Nostris contraria sunt. Quibus omnibus et singulis, illorum tenore præsentibus pro plene et sufficienter expresso et de verbo ad verbum inserto habentes, illis alias in suo robore permansuris,



ad præmissorum effectum tantum specialiter et expresse derogamus, cæterisque in contrarium quibuscumque.

Volumus autem, ut earumdem præsentium litterarum transsumptis seu exemplis etiam impressis, manu alicuius Notarii publici subscriptis, et sigillo personæ in ecclesiastica dignitate constitutæ munitis, eadem prorsus fides in iudicio et extra adhibeatur, quæ præsentibus ipsis adhiberetur, si forent exhibitæ vel ostensæ.

Datum Romæ, apud S. MARIAM majorem sub annulo Piscatoris, die trigesimo Iulii MDCCCIV, Pontificatus Nostri anno quinto.

R. Card. Braschius de Onestis.